



Aalisarnermut Piniarnermullu Naalakkersuisup, Karl Tobiassenip KANUAANA-p ukiumoortumik 2023-mi ataatsimeersuarnerani ammaalluni oqalugiaataa.

Nuannaarutigaa ukiumoortumik ataatsimiinnissinni oqaaseqarsinnaagama, tamassilu ukiortaami pilluaritsi. Neriuppunga ilaqttasi ilagalugit juullisiorluarsimassasusi ukiumullu nutaamut iserluarsimassasusi, taamaasillusi 2023-mi suliaasarpassuarnut pissanganartunut suliaqarnissamut piareerlusi.

Aalisarneq Kalaallit Nunaanni inuussutissarsiutit pingaarnersaattut suli inissisimavoq, avammut niuerneq ataatsimut isigalugu niuerutigineqartut 93 procentaralugu. Taamaattumik aalisarnerup piujuaannartitsineq tunngavigalugu ingerlannissaa, pisuussutillu uumassusillit amerliartortuarnissaat kinguaassatsinnut pingaartorujussuusoq oqaatigerusuppara.

Aqutsinerup uumasoqassutsillu atuinerup aalisarnerup piniarnerullu piujuaannartitsinermik kingunilimmik ingerlaannarnissaa, inuiaqatigiinnilu suli ukiorpassuarni iluaqutaasumik atorneqarnissaa qulakkiissavaa. Taannaavoq inatsisinik atuutsitsinitsinni anguniagaq pingaarneq, tassanilu nakkutilliineq pingaartinneqaqaluni inissisimasuuvoq.

KANUAANA-mi nakkutilliineq aaqqissuussamik nalilersukkamik tunngaveqarpoq, sulilu ineriartortinneqaraluartoq, qulliunerusumik nakkutilliinissamik pilersaarummut ilaatillugu nakkutilliinitta pitsaanerusumik isumannaannerusumillu ingerlannissaa qulakkiissavaa, aalisarnermut piniarnermullu nakkutilliisut atorluarnerisigut.

Sapaatip akunnikkaartumik pilersaarutit 2022-mi nangittumik atorneqarput, inuttat atorluarneruneqarnissaannik qulakkeerisussaq, suliat suut naammassineqarsimanerinek tamakkerlugu takussutissiisut, qulliunerusumillu ataatsimoorussamik naliliinermik tunngaveqarluni nakkutilliinissamut tunngavissiisut pigilerisi paasivara.

Inatsisartut Naalakkersuisullu inatsisiliaasa malittarisassaliaasalu malinneqarnissaat qulakkeerinneqataaffigaarsi, taakkuninngalu unioqqutitsisut malittarisassanik paasinninnissaat kingunerinillu, malittarisassanik malinninngikkunik malitseqartinnissaat.

Politikikkut nakkutilliineq malinnaaffigineqartorujussuuvoq, unioqqutitsisunillu nalunaarutinik amerlasuunik tigusaqartarpugut, unioqqutitsilluni qilalugarniarnernik, tuttunniarnernik umimmanniarnernillu, unioqqutitsilluni qassutinik aalisarnermik piniutinillu annaasanik qimaannakkanut tunngassuteqartunik. Sapinngisatsinnik pilersaarusiussaagut, sumiiffiit unioqqutitsiffiunissamik ilimanaatillit ornissallutigit taamaaliornikkut unioqqutitsinissaraluit pinngitsoortissallutigit.

Nuannaarutigalugu oqaatigissavara KANUAANA ukiuni 2020-2021 pingasunik immikkoortortaqalermat - nakkutilliinermut immikkoortortaq, IT-mut nunanillu allanik suleqateqarnermut immikkoortortaq kiisalu allaffissornermut immikkoortortaq. Tassunga ilagitillugu immikkoortortaqarfiit pingasut Ilulissani, Sisimiuni, Nuummilu pilersinneqarlutik, tamarmik immikkut immikkoortortami aqutsisoqarlutik.

Tassunga atatillugu nuannaarutigaara AK peqatigiiffissi suleqatigalugu nutaamik ataatsimoorussamik isumaqatigiisummik suliaqarnissamut aaqqiissuteqarsinnaasimmata.
Tamanna ajunngitsumik alloriarnerujussuuvoq.

KANUAANA-p kilisaatinik avataasiutinik angisuunik nunami usingiarnermik nakkutilliinermik suliaqarnini 2022-mi nangittumik ingerlateqqippaa.

Tamanna suliarujussuuvoq sulisussanillu amerlasuunik pisariaqartitsilluni, minnerunngitsumillu suliaq pingaaruteqartupilussuulluni.

Avataasiutinik fabrikilinnik nunami 2022-mi nakkutilliinerit qulinik ikinnerunngitsut suliarineqaraluartut suli maannamut piumasaqaatinik unioqqutitsisimasunik naammattuuisoqanngilaq. Tamannalu ajunngilluinnarpoq.

Aamma nakkutilliineq Canadami nakkutilliisussaatitaasunik suleqateqarluni ingerlanneqarpoq.

Inuussutissarsiutinik ingerlatsiviit peqatigalugit ingerlatsinermik pilersaarutit suliarineqarsimapput, nutaanillu malittarisassanik aalajangersaanermi inuussutissarsiutinik ingerlatsiviit tusarniaanernut akissuteqaateqarnissamut periarfissinneqarlutik.

Inuussutissarsiutinik ingerlatsiviit malittarisassaliornermi akuutinneqarsimaneri tunngavigalugit, malittarisassanik malinninnissaat naatsorsuutigarpur. Ilisimavara, inuussutissarsiutinik ingerlataqartut nalinginnaasumik inatsisinik malittarisassanillu malinnittuusut.

Nakkutilliineq pillugu nalunaarut 2022-mi suliarineqarluni naammassineqartoq januaarip aallaqqaataani 2023-mi atuutilerpoq.

Naqissuserlugu oqaatigissavara nakkutilliinermik nalunaarut tamatsinnut pingaarutilerujussuummat, elektroniskiusumik pisanik nalunaarsuisalernermut tunngavissiimmat. Elektroniskiusumik pisanik nalunaarsuisarnerup atuutilersinneqarnera ajunngitsumik ingerlanneqarpoq.

Aalisarnek pillugu ataatsimiitsitaliarsuup suliani innersuussutinilu naammassisimalerpai. -Ataatsimiitsitaliarsuup suliassaasa ilagaat aalisarnek pillugu inatsisip kukkunersiorneqarnissaanut innersuussuteqassalluni.

Aalisarneq pillugu inatsisip nakkutilliinermik piginnaatinneqarneq qanorlu ingerlanneqarnissaa tunngavilerpaa, ilissinnit ingerlanneqartussaq. Aalisarnermut inatsit sapinngisamik ullutsinnut naleqqussarniarparput, pisariaqarfiini nakkutilliisinnaatitaanermik suliaqarnerulernissaq nutarsarneqarnissaalu eqqarsaatigalugit.

Aalisarneq pillugu ataatsimiitsitaliarsuup sumulluunniit attuumassuteqanngitsumik KANUAANA – mik misissuisitsinissaq 2021-p naajartornerani innersuussutigaa. Suliarlu tamanna 2022 – mi upernaakkut naammassineqarpoq.

Nalunaarusiaq tamanit takuneqarsinnaalerluni saqqummiunneqarnerata kingornatigut qulequttanik makkuninnga iliuuseqarnissamut innersuussuteqartoqarpoq; Atortutigut tunngavilersuinissaq aamma pappiaqqanik atuivallaarunnaarnissaq, Paasissutissanik katersanik atorluaasinnaaneq, Naleqqussaaneq kinguneqartitsinerillu, Inuussutissarsiutitigut ingerlataqartunut attaveqarneq, Sulisoqassuserlu.

Taakkua saniatigut Naalakkersuisunut siunnersuuteqartoqarpoq, Inatsisartuni oqaluuserisassatut siunnersuutigineqarluni Upernavimmi, Uummannami, Qasigiannguanilu Aalisarnermik Piniarnermillu Nakkutilliisunik pilersitsisoqassasoq.

KANUAANA-mi 2021-mi aamma 2022-mi aaqqissuussaanikkut allannguinerup ingerlanneqarnerata atuutilersinneqarneratalu kingunerisaanik, nakkutilliinerup aaqqissuussamik, nalilersorluakkamik ingerlanneqalernera pissutigalugu, allannguutissatut siunnersuummik Naalakkersuisunut tunniussisoqarpoq, taannalu kingusinnerusukkut ataatsimiitsitaliamit susassaqtumik akuersissutigineqarluni.

Piniarnermik Aalisarnermillu nakkutilliineq pillugu tamakkiisumik naliliinissaq siunertallu tunngavigalugit suliaqarnissat iliuusissanillu pilersaarusiornissat suliarineqartussanngorput. Siunertanik tunngaveqarluni iliuusissanik pilersaarusiornissaq Inatsisartut ukiakkut 2023-mi ataatsimiinnissaanut piariissaaq. Tamannalu qilanaaraara.

Taakkua saniatigut KANUAANA-p angallatit pisoqqat Tuukkat POCA-nik nutaanik pingasunik taarsersorpai. Angallatit marluk tiguneqareerput. Siulleq Ilulissani. Tullialu maannakkuugallartoq Nuummiilluni, Sisimiuni immikkoortortaqaarfimmut tunniunneqarnissami tungaanut.

Angallat qanittukkut piareernissaa immikkoortortaqaarfimmullu Nuummiittunngornissaa ilisimatinneqarlunga. Taamaalilluni immikkoortortaqaarfiit tamarmik immikkut sukkasuunik, atorluarsinnaasunik pisariunnginnerusunillu angallateqalissapput. Angallatinik sumiiffinni

annertuuni nakkutilliineq pitsaanerusorlu suliarineqarsinnaalissasoq neriututigorujussuuara.

KANUAANA politiit angallatigisimasaannik Sisak IV-mik pisinissamut akuerineqarpoq, taanna politiiniit KANUAANA-mut januaarip naajartornerani 2023-mi tunniunneqassaaq. Suliarujussuaq pissanganartorlu aallartinneqarpoq. Nakkutilliisut angallatissaat allaffissornikkut suliaqarfiutigisussaq isorliunerusuni nakkutilliinissamut periarfissiissaaq, nakkutilliineq piffissani sivilisunerusuni saqqumilaarnerusumik ingerlanneqarsinnaalissalluni.

Ilinniaqatigiit nutaat arfineq marlunnik ilinniartulik 2022-mmi aallartipput. Taakku 2024-imi naammassinissaat naatsorsuutigineqarluni. Ilinniartut ilinniagartik aqqutigalugu KANUAANA-mi kinguaariit nikinnerinik qulakkeerinneqataassapput, sulinertillu nukittorsarlugu allartereerlutik.

Nakkutilliinerup aaqqissuussaanerata pinasuartumik ingerlanneqarsinnaanera ilinniarsimanermik piumasaqaateqarpoq, ilinniagaqarsimanerup KANUAANA-mi suliaassanik ingerlatsisinnaaneq qulakkiissammagu, piniarnerup aalisarnerullu iluani suliniuteqarnerungaluarpalluunniit.

Pinasuartumik suliaqarsinnaanerup KANUAANA sulisunik pitsaanerusumik suliniuteqarnerni assigiinngitsuni atorluaasinnaanerulersippaa, ukiumut pilersaarutissinni ilanngissimasassinnik.

Takusinnaasassitut, suliaassat soqutiginarpassuit siunitsinniipput, neriuppunga tamassi immikkut sapinngisannguassinnik pitsaasumik suleqataaffigiumaarisi.

Ataatsimeeqatigiilluarnissassinnik kissaappassi, qujanaq.